



PRIMA SESSIONE URDINARIA DI U 2019

1ère session ordinaire de 2019

28 è 29 di Marzu

28 et 29 mars

2019/O1/029

Question déposée par Romain Colonna au nom du groupe Femu a Corsica

Objet : *u trenu aeru trà a Corsica, a Sardegna è a Toscana*

O sgiò Prisidente di l'esecutivu,

Quand'ella hè ghjunta a magiurità tarritoriale à u capu di e rispunsabilità à a Cullettività, si hè parlatu prestu prestu di un prugettu chì à contu nostru è puru aldilà pà a Corsica sana, si pò qualificà di rivuluziunariu. Si tratta di u famosu trenu aereu trà a Corsica, cù e cità d'Aiacciu è Bastia, a Sardegna cù a cità di Cagliari è l'Italia cù a cità toscana di Pisa. Hè statu issu prugettu una primura maiò di a prima mandatura nostra chì ne hà sgranatu l'idea è l'hà iniziatu è po di sicura avà cù a mandatura attuale.

Vurria apprufittà quì di quella uccasione pà ramintà à livellu storicu a impurtanza trimenda di e nostre rilazione cù l'isula surella, a Sardegna è cù u cuntinente talianu. Oghje dì, ci tocca à rinuvilà issu liame, à rinvisce lu, à invintà lu torna è à fà di a Corsica un centru vivu di u Mare tarraniu. Sò parechji i scopi è e pussibilità di sviluppu : à livellu ecconomicu, à livellu culturale, identitariu è linguisticu, à livellu suciale, à livellu universitariu... sò tamanti l'intreci.

Ùn ci sarà bisognu à ramintà torna una volta chì a nostra lingua corsa, à dispusizione quì, subbitu subbitu, sottu à i nostri passi d'ogni ghjornu, ci parmette senza difficoltà alcuna di cumunicà cù 60 milioni di parsoni !

A storia cuntemporanea è a cuncipitura parigina di u tarritoriu ci anu toltu guasgi in tuttu i nostri rapporti cù l'Italia è a Sardegna. Ùn si pò più accittà quella rumpitura nè u fattu chì guasgi ogni volta, bisogna à passà pà isse France pà andà in Italia in aviò nè di mette l'ore è l'ore pà andà in Sardegna. A Sardegna, cun quale ci hè statu messu aghjà in ballu un cunsigniu corso-sardu, si ne stà à una manata di chilometri da a Corsica è quella di Piombinu in Italia vene à circa 90 chilometri da a Bastia, duie volte di menu cà Nizza è quelle sponde francese.

A lingua, a giuografia, a storia... tuttu ci cumanda di rinfurzà e leie cù l'Italia è a Sardegna.

Pà u trenu aereu, emu intesu parecchje infurmazione issi pochi mesi à livellu di a finalizazione di quellu prugettu tamantu à prò di a Corsica è di so intaressi. Vurriamu sapè ne di più nantu à l'avanzate di u cartulare postu ch'è no sariam fora di a cuntinuità tarritoriale. À chì ne semu di l'accordi cù a Sardegna è a Toscana ? À chì ne semu di a fasa tennica è di u finanziamentu ? Si farà in lu quattru di cunvinzione di delegazione di sirvizi publicu ? À quandu u primu volu ?

À ringrazià vi !